

豫

章

焚

書

第一五五冊

幾

年

幾

書

卷之四

碧梧玩芳集卷五

宋 馬廷鸞 撰

制

顯謨閣待制兩浙路轉運趙與峕特授尚書戶
部侍郎兼知臨安府制

唐戶部之用李回取其治辨漢京兆之命劉德多所
平反嗟古人各擅於一長匪宗雋孰兼於二任具官
某材猷庸敏智略通明象賢爲秀邸之英大雅軼河
間之譽豈無他人不如同姓見謂親賢用於昔日稱
之曰能簡知先帝治常賦者民部建首善者京師命

以貞除皆其素歷朕式敷德惠善繼先猷以庶邦惟
正之供悉却奉宸之獻則百姓孰與不足冀寬天下
之民非屬宗英疇知予意噫嗣王求助莫先論思獻
納之聯宗子維城首課蕃宣屏翰之績欽承明訓益
勵嘉庸可

觀文殿學士提舉臨安府洞霄宮馬光祖依前
職特授沿江制置大使兼知建康府兼江東安
撫大使兼行宮留守制

朕簡求近弼重鎮陪京念昔全江淮以濟中興允資
碩望矧今崇詩書而謀元帥詎舍舊人起之燕閒付

以居守爰疏茂渥申錫贊書具官某器偉量閎資凝猷遠炳著龜之先見凜松柏之後凋方叔元老克壯其猷歷蕃宣於四國君陳嘉謀入告爾后嘗唯諾於一堂頃以藎臣薦分江閫投鞭欲渡有颺回霧塞之顯憂仗鉞以先助霆擊電掃之勝勢威名猶在義槩可嘉朕慨念留都控扼天塹雖干羣奚用已屹立金湯之形然一物不牢敢少怠衣袵之戒孰寬憂顧無若老成兵將素服其撫循民吏夙安其條教龍蟠虎踞山川不易於鎮臨魚鱗麟符麾幟一新於號令以壯外攘敵人之畧以恢北定中原之規噫并以清修

固再臨於益部琦以勛輔尙三典於相臺勉企前修
益光賢業可

朝請大夫試兵部侍郎兩淮制置使兼知揚州
李庭芝除寶章閣直學士依舊仕制

元帥崇詩書久幹方而佐辟學士備顧問爰進律以
褒功廸惟英儒允稱茂渥具官某經綸學富綏御謀
長材能空冀北之良人物挺漢東之秀正封從軍之
句蚤欲驅海若而逐天狼德裕籌邊之圖可以扼吐
蕃而控南詔五年制閫兩道撫師齊人章章而歸魯
疆申伯亶亶而維周翰率彼淮浦賢於長城春爾條

桑秋爾條場坐喜邊民之復業文能附眾武能威敵
疇非師蜀之成勞伊功伐之可稱屬倚毗之方厚登
華遂閣增重禁塗仍資固圉之謀嗣奮折衝之畧噫
寧人有指疆土永言寶宇之儲賢者能立邦家在固
金甌之業式寬憂顧益懋綏懷可

兩淮安撫制置使兼知揚州李庭芝特授寶章
閣學士依舊任制

朕祗膺遺訓嗣守丕圖見堯於牆敢忘繼承之志維
周之翰肆酬藩屏之庸嘉乃殊勞畀予新渥具官某
忠忱一節文武兼資被遇先皇久臨制闕王師截淮

蒲所期徐土之清諸將收山東坐使齊疆之復狼烽
灰冷木柝聲沈我陵我阿有藝祖興王之境實庸實
壑拓中興用武之區越自紹統之初式倚幹方之績
茲崇褒律以起駿功煥乎文章固已陟穹班於寶戩
戒我師旅其惟固全業於金甌可

汪立信除秘閣修撰樞密副都承旨依舊沿江
制置副使江西安撫使制

長江爲天限久分塹於中流北斗幹神樞俾親承於
密旨嘉乃幹方之烈昭予進律之恩必也正名爲之
甲命具官某賦資平實受材恢宏九流之學圓機干

人之英脫穎有慷慨大志匪章句儒以文武威風當
方面寄睠言外屏允藉通材鎮臨莫重於潯陽備禦
遠周於淮浦中權後勁輯萬竈之雲屯上遡下沿撫
千艘之水擊豈投鞭之可逞縱呼檄以不來爰獎茂
庸肆頒殊渥峻道山之論撰贊宥府之訏謨兼正使
名增崇闢制吁爾不可厭也所宜謹護於風寒吾有
以待之靡俟綢繆於陰雨欽予辰告賴爾秋防可

汪立信除集英殿修撰依舊樞密副都承旨沿
江制置副使知江州江西安撫使制

朕祗膺遺訓嗣守丕圖見堯於牆敢忘繼承之志維

周之翰肆酬藩屏之庸嘉乃殊勞畀予新渥爾忠忱
一節文武兼資被遇先皇久臨江閩勢連全楚控荆
鄂之上流境接長淮固斬黃之外屏塞烽息警邊析
沈聲粵惟紹統之初實倚幹方之績茲崇褒律以起
駿功十三等殿閣之班官分冷熱數千里江防之寄
職護風寒勉建嘉猷答揚休命可

集英殿修撰江東運副兼淮西總領陸景思特
授權戶部侍郎淮東總領制

朕嘉與儒臣精求國計周官以小司徒掌教唯人民
土地之稽本朝以四總領供軍有錢穀甲兵之間就

膺隆委沈屬通材具官某學該體用之源家擅文章
之錄夙繇駿望早上通塗四禁代言允茲潤色十連
爲帥式倚蕃宣察其器能政理之長不在語言文字
之末雖精筆妙墨揚雄最其善鳴然畫笏籌邊劉晏
本於道御旣勤轉漕併總賦輿惟六官服采而版部
最勞四鄙宿兵而大農益耗量入爲出計臣所以阜
邦財自西徂東王人均於領餉事其升從橐仍駕使
輶諒無乏興庶幾宿飽噫振甘泉之珮旣高獻納之
通聯濟京口之航宜贊誓清之遠略可

陳宗禮除直龍圖閣淮西轉運使制

朕解瑟而更招弓四出卷阿言求士每懷朝陽高岡
之鳴宣室不見生未奉夜半前席之問特進淵圖之
直俾華冰漕之行爾行已無磷緇立朝有本末榮進
素定固知要路之在前介特自持詎忍撓節而速化
淖邪朋之欺蔽嘉正論之指陳起之山林畀以原隰
中遭煩嘖久已照知念爾滯留再膺臨遣噫轉關中
之漕莫如淮浦之事優督渭上之耕宜使邊庭之略
足勉將明指豈汝遐遠可

中大夫吳堅特授華文閣待置福建路計度轉

運使制

朕治本愛民仁宜舉遠睠七閩之奧壤孰任澄清咨
兩禁之近臣式勤諏度起之家食送以皇華具官某
博識通材清文贍學從塗筆橐先朝峻列於嚴徐儲
案衣冠東禁嘗參於黃綺王乃初服爾惟舊人茲振
迹於邱園俾馳聲於原隰旣輸爾載靡彈晉監之藏
用告乃猷仍俟漢松之對倘宣使指斯究民瘼刺史
問事有六條允資按察建州去京八千里尙克將明
務綏遠民以稱茂簡可

史繩祖陞直煥章閣江東提舉制

朕詢求民隱臨遣儒英乃積乃倉無復西江之轍涸

爰咨爰度尙虞東國之杵空以爾人有典型學探淵
蘊繙十二經之說仰屋著書以六百石之官乘輅刺
部重巽申命自西徂東煥乎有文章仍直寶儲之峻
節之以禮樂彌增英蕩之華噫考常平置使之規驗
熙寧設官之意六條之察國家之成憲不踰一分之
寬儒先之格言有味維予雋老奚待訓詞可

朱應元直徽猷閣浙東提刑兼提舉制

朕視東浙如古左馮乃積乃倉常憂百姓之不足宜
岸宜獄尤期一道之無冤蓋儒者惟知厚民而仁人
可以聽訟就以雙節畀之能臣爾寬閔而疏通詳練

而平實湖湘使還之日嘗登汝以九列矣浙河擇使
復俾乘輶庾政汝優爲之而七郡嘉師獄法繁夥惟
明慎者盡心焉峻之貼職以華其行往欽哉使倉廩
盈而囷圀空雖古庸使其猶劣諸四牡勞來宜有顯
擢可

季鏞除右文殿修撰依舊知紹興府制

會稽太守古尤重於介藩南陽帝鄉今特雄於輔郡
旣得惟良而作牧毋庸數易以病民爾從容以和順
密以粟飲水食藥夙持潔已之聲求牧與芻無負宅
生之寄克施有政甚宜其民浙水東七州有嘉治理

殿閣十三等英重集仙肆升論撰之華以獎中和之
效鎮臨惟舊寵渥又新懷印綬歸吏免迎買臣之役
以春秋對朕無詰嚴助之書祇服訓詞勉建多績可

季鏞依舊秘閣修撰知紹興府浙東安撫使制
合兩道而建臺已課輸將之績分十連而置帥尤資
牧御之材爰屬帝鄉密藩行闕况重臨於并部宜愈
治於潁川爾溫雅而精明端亮而篤實久宣勞於中
外亦寢歷於清華千里曰王畿既任輓粟飛芻之事
六廉察吏治殊高飲冰食蘖之風朕道本愛民任先
宅牧爾以脂膏之身而不潤吾於股肱之郡以得人

欲慰豐粉之民式廣召棠之政仍聯中秘書之論撰
以示東諸侯之表儀噫非有所聞豈屢試蕭生於馮
翊與我共理庶幾贊漢業之中興可

觀文殿學士提舉臨安府洞霄宮李曾伯依舊
職知慶元府沿海制置使制

朕槃澗碩人蓋久安於閒燕海濱赤子茲選昇於賢
良睠言外執政之舊臣宜付東諸侯之重寄有光作
屏特侈揚綸具官某精敏而疏通寬闊而沈毅允文
允武克壯其猷自東自西不遑宣處蚤已奮幹方之
畧中嘗收敵愾之勲惟受任於時艱則利鈍豈能逆